

# GÁLATAS

## *Saludo*

<sup>1</sup> Núa Pablo nubànùacué pirí cuyàluta. Apóstolca núa, Dios ibànuèrica nucàlidacaténá itàacái wenàiwicanái irí. Càmitaté wenàiwicaníai cài imàaca núa apóstolpiná càmitaté nacái wenàiwicaníai cài ibànùa núa nucàlidacaténá Dios itàacái. Néese yái Jesucristoca yácata ibànuèrica núa. Idéca nacái Dios ibànùaca núa, yái Wáaniri Dios imichàidéericaté Jesucristo yéetácáisi íicha. <sup>2</sup> Macáita níái wéenánáica núapichéeyéica yeebáidéeyéica Jesucristo itàacái, nawàwalicuéca pía. Nubànùacué pirí cuyàluta píacué macáita yeebáidéeyéica Jesucristo itàacái ìwacáidáyaquéeyéicawa yàcalé imanùbaca Galacia yàasu cáli ínatéeyéica iyaca. <sup>3</sup> Nusutácué Wáaniri Dios íicha pirípinácué, Wáiwacali Jesucristo nacái namàniinápinácué pirí cayábéeri mawèníri iyú namàacáanápinácué nacái piyaca matuíbanáiri iyú. <sup>4</sup> Yái Jesucristo imàacacaté icáucawa yéetácaténáwa wáichawalíná, ipíchaná Dios yùuwichàidaca wía wabáyawana íwalísewa. Càité Jesucristo imànicia iwasàacaténá wía íicha yái báawéeri èerica càide iyúwaté Wáaniri Dios iwàwáaná imànicia walí, yái Wacuériná Diosca. <sup>5</sup> ¡Iná wàacué Dios irí cayábéeri càiripináta, yái cachàiníri íwitáiseca iyéerica chènuniré cáimiétaquéeri iyú, icànéeri nacái icamaláná mèlumèluíri irícuwa! Básíta, amén.

*No hay otro mensaje de salvación*

**6** Mánícué achúmaca nuwàwa nuínáidacawa nuémìaca piináwaná ìwali, càulenáca nacái nuebáidaca yái náimáanáca piwalicué piwènúadacasacué píiwitáisewa caquialéta Dios íicha. Dios idéca imáidacuéra pía yéewanápinácué Cristo imànica pirí cayábéeri mawèníri iyú quéwa pidécuéra piwènúadaca píiwitáisewa peebáidacaténácué cachìwéeri tàacáisi áibanái límíerica ìwali iwasàanápinásacué pía Dios yàasu yùuwichàacáisi íicha. **7** Quéwa canáca áiba tàacáisi báisíiri iwaséeripináca wía Dios yàasu yùuwichàacáisi íicha. Néese nàyaca meedá áibanái piatalécué imènìadéeyícuéra pía cachìwéeri tàacáisi iyú íná báawaca píiwitáise píapichawáaca. Nawàwa nacái nawènúadaca Dios itàacái báawacaténá namànicani, yái tàacáisi icàlidéerica Cristo iwasàaca wenàiwica Dios yàasu yùuwichàacáisi íicha. **8** Quéwa, péemìacuéra cayába, áibanáicalí icàlidacuéra pirí áiba tàacáisi méetàuculéeri íicha yái wacàlidéericatecúe pirí, yásí Dios yùuwichàidacani càiripináta. Càita nacái nucàlidacaalícuéra pirí áiba tàacáisi, yásí Dios yùuwichàidacaní núa càiripináta. Càita nacái chènuníiséeri ángel icàlidacaalícuéra pirí áiba tàacáisi, yásí Dios yùuwichàidacaní càiripináta. **9** Nudéca nucàlidacuéra piríni quéwa siùcade nucàlidacuéra pirí àniwani: Aibacaalí icàlidacuéra pirí áiba tàacáisi méetàuculéeri íicha yái wacàlidéericatecúe pirí, yá Dios yùuwichàidéeripiná càiripináta.

**10** Càmita quirínama nucutá cayábacaténá meedá wenàiwicanái iicáca núa, néese nucutáca cayábacaténá Dios iicáca yái numànírica. ¡Núalimáidacaaalí mamáalàacata numànicia meedá càide iyúwa casíimáiná wenàiwicanái iicácatá, néese

càmita Cristo yàasu wenàiwica núatá!

*Cómo llegó Pablo a ser apóstol*

**11** Píacué nuénánáica, nuwàwacué píalíacawa ìwali yái tàacáisi nucàlidéericuéra pirí Jesucristo ìwali, yái tàacáisi íiméerica Jesucristo iwasàaca wenàiwica Dios yàasu yùuwichàacáisi íicha. Càmitaté èeri mìnánái níái cài ichùnìaca yái tàacáisi náalíacái iyúwa. **12** Càmitaté wenàiwicanái níái cài imàaca nulí yái tàacásica. Càmita nacái néewáida núa cài. Néese Jesucristocata yái imàaquéerica núalíacawa nucàlidacaténá wenàiwicanái iríni.

**13** Pidécuéra péemìaca nuináwaná ìwali càinácalíté numànica bàaluité nuèpunícaalítéwa càide iyúwa judiónái yéewáidáaná. Píalíacuéra nùuwichàidacaté Dios yàasu wenàiwica mamáalàacata, máiní báawéeri iyú, níara yeebáidéeyéicaté Jesucristo itàacái. Nunúacaté manùbéeyéi numáalàidacaténá níia. **14** Nuèpunícaínátéwa càide iyúwa judío íiwitáise iyáaná, yáté máiní numànica cachàiníiri iyú náicha madécaná nunacáiyéicawa nuénánái judíoca máinícáináté cachàiníwanái náicha numànicaté macáita machacàníiri iyú càide iyúwa wàawirináimi judío íiwitáise íimáaná. **15** Quéwa ipíchawáiseté numusúaca nuicáca èeri, Dios yeedácaté núa nuíbaidacaténá irípiná. Yá cáininácainá Dios iicáca núa, íná imànica nulí cayábéeri mawèníiri iyú imáidáanápínáté núa nuíbaidacaténá irípiná. Néese Dios íináidacatéwa imàacáanápínáté nuicáca Jesucristo. Yáté nuicácani. **16** Dios imàcacaté núalíacawa Dios liricani yái Jesucristocata, yéewanápíná nucàlidaca yái tàacáisi Jesucristo ìwali

càmíiyéi judío irí. Idécanáamíté Dios imàacaca nuicáca liri, yá càmitaté nuwàwacutá áibanái wenàiwica yéewáidáanápináté núa. **17** Càmitaté nacái nùawa Jerusalén iyacàlená néré nuicácaténá niara apóstolca, Dios imáidéeyéicaté nupíchawáise. Càmitaté nusutá nuémìawa nía nùasu tàacáisi ìwali Dios imàaquéericate nulí. Néseté nùacatéwa machacànita Arabia yàasu cáli néré. Nésetécáwa nuèpùacawa Damasco iyacàlená néré.

**18** Néseté másiba camuí idénáami, yá nùacatéwa átata Jerusalén iyacàlená néré, nupáchiacaténáté Pedro néré, idàbáanáté nùacawa yéewanápiná núalía nuicáca Pedro. Yáté nuyamáacawa Pedro yáapicha quince èeri. **19** Quéwa canácata nuiquéeri áibanái apóstol, abéerita Santiagoquéi nuicá, yái Wáiwacali iméerérica. **20** Núumacué pirí báisiíri iyú, abéerita Jesucristo yái cài imàaquéericate núalíacawa itàacái. Dios yáalíacawa nucàlidacuéca pirí báisiíri iyúni.

**21** Néese idécanáamíté nupáchiaca néré, yáté nùacawa Siria yàasu cáli néré, Cilicia yàasu cáli néré nacái. **22** Níara wéenánái yeebáidéeyéicaté Cristo itàacái ìwacáidáyaqueyéicatéwa yàcalé imanùbaca Judea yàasu cáli ínata, càmíiyéicawaté yáalía iicáca núa. **23** Néemìacáitaté nuináwaná ìwali. Cài náimacaté nùwali: “Yáta yùuwichàidéericate wía bàaluité, yái iwàwéericate imáalàidaca wía ìwalíse yái weebáidáanáca Jesucristo itàacái, siùcade yàaca yàalàaca wenàiwica neebáidáanápiná Jesucristo itàacái”, cài náimacaté nùwali. **24** Yá nàacaté Dios irí cayábéeri nùwali Dios iwènúadacáináté irípináwa nuíwitáise.

## 2

*Los otros apóstoles aceptan a Pablo*

<sup>1</sup> Néeseté catorce camuí idénáami, yátē nuèpùa nùacawa Jerusalén iyacàlená nérē àniwa Bernabé yáapicha, yá nutécaté Tito núapichawa. <sup>2</sup> Nùacatéwa nérē Dios ichùullacáinátē nùanápináwa nérē. Néeseté Jerusalén iyacàlená néenibàa nùacawa nàatalé níara nacuèrinánái cáimiétacanéeyéica, watàanícaténá wáapichawáaca méetàucuta áibanái íicha. Yá nucàlidacaté nacuèrinánái irí yái tàacáisica nucàlidéerica càmíiyéi judío irí, iiméerica Jesucristo iwasàaca wenàiwica Dios yàasu yùuwichàacáisi íicha. Nuwàwacaté cayábaca néemìaca nùasu tàacáisi ipíchanátē canáca iwèni yái íibaidacalésica numàníiricaté Dios irípiná, càita nacái yái íibaidacalési numànírica siùcade. <sup>3</sup> Néenialíté abénaméeyéi cachìwéeyéica nacàlidacaté iwàwacutáanása namànicà circuncisión Tito irí, yái núapichéerica griegosàiri, càmírica judío. Quéwa níái nacuèrinánáica càmitaté nachùullà Tito namànníinápiná irí circuncisión. <sup>4</sup> Níara ichùuliéyéicaté namànníinápiná circuncisión Tito irí, cachìwéeyéica nía meedá icàlidéeyéicaté iináwanáwa neebáidáanása Jesucristo itàacái. Nawàlùacatéwa wèewiré ibàacanéeri iyú. Yá nawàwacaté nacháawàaca wainawaná ìwali càmicáinátē wamàni macái càulenéeri wawàsi profeta Moisés ichùulièricaté israelitanái imànicà nàacaténátē Dios icàaluíniná. Quéwa Cristo Jesús iwasàacaté wía Moisés yàasu tàacáisi íicha. Càité cachìwéeyéi namànicà nawàwacáinátē nadacùaca wía wamànníinápinátē àniwa càide iyúwa Moisés ichùullianá israelitanái bàaluité. <sup>5</sup> Quéwa càmitaté

weebá natàacái ibatàa abéeri momentopináta, wawàwacainátē wacùacuéca pirípináni yái tàacáisi báisírica íiméerica Jesucristo iwasàaca wenàiwica Dios yàasu yùuwichàacáisi íicha mawèníri iyú.

<sup>6</sup> Níái nacuèrinánái áibanái iiquéeyéica cáimiétaquéeri iyú, càmitaté nachùulìa nucàlidáanápiná áiba wawàsi wàlisài càmíiyéi judío irí, néese cayábacaté naicáca nucàlidáanátē Jesucristo iináwaná. Quéwa càmitaté nucutá cayábáanápiná naicáca núua éwita cáimiétacanéeyéicáaníta nacuèrinánáica níia, càmicáiná Dios iicá abéeri wenàiwica iyúwa cayábéeri áibanái íicha. <sup>7</sup> Càmitaté nachùulìa nucàlidáanápinátē áiba wawàsi wàlisài, néese náimacaté nùwali báisícata Dios ichùulìacaté nucàlidáanápiná itàacái càmíiyéi judío irí, yái tàacáisi íiméerica Jesucristo iwasàaca wenàiwica Dios yàasu yùuwichàacáisi íicha; càité nacái Dios ichùulìacaté Pedro icàlidáanápiná yái tàacáisi judiónai irí. <sup>8</sup> Dios ibànùacainátē Pedro iyúwa apóstol icàlidacaténá Jesucristo iináwaná ìwali judónai irí. Càita nacái Dios ibànùaca núua iyúwa apóstol nucàlidacaténáni càmíiyéi judío irí.

<sup>9</sup> Inátē Santiago, Pedro nacái, Juan nacái, níái áibanái iiquéeyéicaté iyúwa nacuèrinánáwa, níata yáalíacatéwa Dios imànicaté nulí yái cayábéerica mawèníri iyú, imàacacaténátē nucàlidaca itàacái càmíiyéi judío irí. Néeseté náibàaca nacáapiwáaca wáapicha, núua, Bernabé nacái náasáidacaténá casíimáica naicáca wía iyúwa nàacawéeyéináwa iyúudèeyéica níia. Yáté abédanamata náiwitáise nacái wáapicha wacàlidáanápinátē Jesucristo iináwaná ìwali càmíiyéi judío irí idècunitàacá

áibanái apóstol íbaidaca Dios irípiná nacàlidacaténá itàacái judiónái irí. <sup>10</sup> Nasutácaté wáicha abéeri wawàsi meedá wayúudàanápинátē catúulécanéeyéi wenàiwica, yeebáidéeyéica Jesucristo itàacái. Càita núalimáidaca numànica cáalíacáiri iyú càiripináta.

*Pablo reprende a Pedro en Antioquía*

<sup>11</sup> Quéwa Pedro idécanáamitέ yàanàaca Antioquía iyacàlená néré, néese núalàacani cachàiníri iyú imànicainátē yàacawa áiba wawàsi báawéeri. Càité imànica: <sup>12</sup> Quéechatécáwa Pedro imànicaté cayábéeri, yátē iyáaca iyáacaléwa wéenánái yáapicha, níara càmíiyéica judío yeebáidéeyéica Jesucristo itàacái. Néeseté abénaméeyéi judío yàanàaca néré nacái, níái judío Santiago ibànuèyéicaté néré, Jerusalén iyacàlená néeséeyéi. Idécanáamitέ nàanàaca, yá báawacaté naicáca Pedro, yàacawéeridacainátē càmíiyéi judío. Inátē Pedro iwènúacawa càmíiyéi judío íicha yeebáidéeyéica Jesucristo itàacái, càmitaté iyáa iyáacaléwa náapicha cài quirínama cáalucainátē Pedro iicáca níái judío yàanèyéicaté Jerusalén néese, casacàacainá judiónái iicáca càmíiyéi judío. <sup>13</sup> Néeseté áibanái judío iyéeyéicaté yàcalé irìcu yeebáidéeyéica Jesucristo itàacái, abédanamata namànica náiwitáisewa Pedro yáapicha, namànicaténá càide iyúwa pucháibéeyéi íwitáise. Yátē càmita quirínama Bernabé yàacawéeridaca wéenánái càmíiyéi judío. <sup>14</sup> Nuicácaté càmita namàníiná càide iyúwa báisíiri tàacáisi yéewáidáaná wía, yái tàacáisi íiméerica Jesucristo iwasàaca wenàiwica Dios yàasu yùuwichàacáisi íicha mawèníiri iyú,

cawinácalí wenàiwica yeebáidéeyéica Jesucristo. Inátē nùalàaca Pedro cachàiníiri iyú nàacuésemi macáitaní yeebáidéeyéica Jesucristo itàacái ìwacáidáyaquéyéicatéwa néré. Núumacaté Pedro irí: “Pía judíosàirica, quéechatécáwa piacawéeridacaté wéenánái càmíiyéica judío càide iyúwa càmíiri judío, píalíacáinátéwa cáinináca Dios iicáca macái wenàiwica íwitáaná abédanamata, íná ¿cáná pichùulìa cài nàyaca càide iyúwa judío íwitáise iyáaná, nái wéenánái càmíiyéica judío yeebáidéeyéica Jesucristo itàacái?” càité núumaca Pedro irí.

*Los judíos y los no judíos alcanzan la salvación por la fe*

<sup>15</sup> Néeseté núumaca Pedro irí: “Pía, núa nacái, wíata asáiyéi iyúwa judíonái, càmitaté wamàni iyúwa càmíiyéi judío imàníná, càmíiyéica yeebáida Dios itàacái profeta Moisés itànèericaté. <sup>16</sup> Quéwa éwita judíocáaníta wíta, càicáaníta wáalíacawa càmita mabáyawaná Dios iicáca wíta ìwalíise yái wamàníináca càide iyúwa Dios itàacái íimáaná profeta Moisés itànèericaté. Néese mabáyawanáca Dios iicáca wíta abéerita ìwalíise yái weebáidáanáca Jesucristo. Iná wíta nacái judíoca wadéca weebáidaca Jesucristo yéewanápiná mabáyawanáca Dios iicáca wíta ìwalíise yái weebáidáanáca Jesucristo, càmita ìwalíise yái wamàníináca càide iyúwa Moisés yàasu tàacáisi íimáaná. Canácainá wenàiwica Dios iiquéeri mabáyawanéeri iyú ìwalíise yái imànínáca càide iyúwa Moisés yàasu tàacáisi íimáaná”, núumacaté Pedro irí.

**17** Uwé, càita weebáidaca: Mabáyawanáca Dios iicáca wía wàyacáiná abédanamata Cristo yáapicha. Iná áibanái judío càmíiyéi yeebáida Cristo náimaca wàwali càicasa wíade iyúwa càmíiyéi judío cabáyawanéeyéica, càmicáiná wachùullà wenàiwica namànica macáita càide iyúwa Moisés yàasu tàacáisi íimáaná. Iná náimaca Cristo idécase cabáyawanáca imànica wía. ¡Càmírita! **18** Néese cabáyawanáca wía báisíiri iyú wèepùacaalí wéewáidaca wenàiwica iwàwacutáanápinásá namànica càide iyúwa profeta Moisés yàasu tàacáisi ichùullianá yéewacaténásá cayábaca Dios iicáca wía. Wadéca wáasáidaca càmita Dios iicá wía mabáyawanéeri iyú ìwalíise yái cayábéerica wamànírica. **19** Yái tàacáisi Dios imàaquéericaté profeta Moisés irí yáasáidacaté nulí iwàwacutáanáté nuétacawa nubáyawaná ichùulliacawa càmicáináté nudé numànica macáita machacàníiri iyú càide iyúwa Dios itàacái ichùullianá wí. Quéwa Cristo yéetácatéwa cruz ìwali nuíchawalíná ipíchaná Dios yùuwichàidaca núa nubáyawaná ìwalísewa. Siùcade nùyaca abédanamata Cristo yáapicha. Iná yái tàacáisi Dios imàaquéericaté Moisés irí càmita quirínama icháawàaca nubáyawaná. Càmita nacái nucutá Dios iwasàaca núa yàasu yùuwichàacáisi íchawa ìwalíise yái numànínáca càide iyúwa Moisés yàasu tàacáisi íimáaná. Càité Dios imànica nulí nùyaténá machacàníiri iyú siùcade càide iyúwa Dios iwàwáaná. **20** Siùcásede càmita nùya nucáuca iyúwa, néese Cristo icáuca iyúcata cài nùyaca. Iná yéewa idècunitàacá nùyaca chái èeri irìcu, yá nuebáidaca Dios Iiri itàacái, yái cáininéericaté iicáca núa, imàaquéericaté nacái icáucawa yéetácaténáwa

nuíchawalíná. <sup>21</sup> Càmita caná iwèni nuicáca yái Dios imàníináca walí cayábéeri mawèníiri iyú, néese núalíacawa Cristo yéetácatéwa wáichawalíná wabáyananá ìwalíise yéewanápiná mabáyananáca Dios iicáca wía. Néeni, mabáyananácaalíté Dios iicáca wía ìwalíise yái wamàníináca càide iyúwa itàacái bàaluisàimi ichùulìaná wamànicá, yá canáca iwèni meedá yái Cristo yéetáanácacatá.

### 3

#### *La ley o la fe*

<sup>1</sup> ¡Píacué Galacia yàasu cáli néeséeyéica, càmitacué pínáidawa cáalíacáiri iyú! Aiba wenàiwica idéca ichìwáidacuéca pía, íná pínáidacuécawa máiwitáiséeri iyú, yá pidécuéca peebáidaca cachìwéeri tàacáisi. Nucàlidacatécué pirí Jesucristo iináwaná ìwali máiní machacàníiri iyú. Nucàlidacatécué pirí Cristo yéetáanátéwa cruz ìwali wáichawalíná. Yáté píalíacuéwa cayába amaléeri iyúni cáná yéewaná Jesucristo yéetácatéwa, càide iyúwa nudéca nacáicaalícué numàacaca piicácani pituí iyúwa. <sup>2</sup> Péemìacué cayábani: Píalíacuéwa Espíritu Santo càmitaté iwàlùawa piwàwalìculé ìwalíise yái pimàníinácuéca càide iyúwa Moisés yàasu tàacáisi ímáaná, yái tàacáisi Dios imàaquéeritaté profeta Moisés irí. ¡Càmírita! Néese Espíritu Santo iwàlùacatécué piwàwalìculé peebáidacainaté yái tàacáisi péemièricatécué, yái Jesucristo iináwanáca, iwasàa wenàiwica Dios yàasu yùuwichàacáisi íicha. Iná píalíacatécué amaléeri iyúni Espíritu Santo càmitacué iwàlùawa piwàwalìculé ìwalíise yái pimàníináca iyúwa

Moisés yàasu tàacáisi íimáaná. <sup>3</sup> ¿Cánásicué yéewaná máiní máiwitáiseca pía? Pidàbacatécué pèepunícawa Cristo yáapicha Espíritu Santo ichàini iyú, íná siùcade, ¿cánácué piwàwa píalimáidaca piyaca machacànlíri iyú pichàini iyúcuéwa meedá? <sup>4</sup> Yái Espíritu Santo idéca imànicuéca pirí madécaná cayábéeri. ¿Cánácué piwàwa piúcaca píchawa siùcade meedá macáita yái cayábéerica? ¡Nuttuýàaca càmínápinácué pimàni cài! <sup>5</sup> Dios idéca imàcacuéca pirí Espíritu Santo, yá siùcade Dios imànica ìyaca pèewi yái canáca áiba yáaliméeri imànica. Dios càmitacué imàni pirí càiri cayábéeri ìwalíise yái pimàníinácuéca càide iyúwa itàacái bàaluisàimi íimáaná, yái tàacáisi Dios imàaquéericaté profeta Moisés irí. Néese Dios imànicuéca pirí yái cayábéerica ìwalíise yái peebáidáanácuéca tàacáisi péemièricatécué Cristo ìwali.

<sup>6</sup> Abraham yeebáidacaté Dios, yáté mabáyanáca Dios iicácani. <sup>7</sup> Iná iwàwacutácué píalíacawa cawinácalí yeebáidéeyéica Dios càide iyúwaté Abraham yeebáidáaná, Dios iicáca nía iyúwa báisiyéi Abraham itaquénainámi. <sup>8</sup> Dios itàacái yásáidaca walí Dios íináidacatéwa bàaluité iwasàanápinátē càmíiyéi judío nabáyaná íichawa, yéewacaténá mabáyanáca iicáca nía, cawinácalí yeebáidéeyéipinácaté Dios. Càité Dios icàlidaca Abraham iríni bàaluité, yái tàacáisi cayábéerica. Dios íimacaté Abraham irí: “Numànipiná cayábéeriwa macái èeri mìnanái irí yeebáidéeyéica núá càide iyúwa peebáidáaná”, íimacaté yái Diosca. <sup>9</sup> Iná yéewa macáita wenàiwica cawinácalí yeebáidéeyéica, Dios imànica nalí

cayábéeri càide iyúwaté imàníiná Abraham iríni, yái yeebáidéericaté Dios nacái.

**10** Abénaméyéi wenàiwica iwàwaca mabáyawanáca Dios iicáca nía ìwalíise yái namàníináca càide iyúwa Moisés yàasu tàacáisi úimáaná. Quéwa càmita náalimá namànica machacàníri iyú macáita càide iyúwa yái tàacáisi ichùulìaná namànica. Iná cabáyawanáca nía, iwàwacutá nacái néetácawa nabáyawaná ichùulìacawa, yácainá áiba profeta itànàacaté Dios itàacái úiméerica: “Iwàwacutá yéetácawa ibáyawaná ichùulìacawa cawinácaalí càmírica imàni mamáalàacata macáita càide iyúwa Moisés yàasu tàacáisi ichùulìaná”, úimaca. **11** Iná wáalíacawa amaléeri iyúni canácata wenàiwica mabáyawanéeripiná Dios iicáca ìwalíise yái imàníináca càide iyúwa Moisés yàasu tàacáisi úimáaná. Yácainá áiba profeta itànàacaté Dios itàacái úiméerica: “Mabáyawanáca Dios iicáca níawamita yeebáidéeyéica Dios. Nàyapiná Dios yáapicha càiripináta”, úimaca yái Dios itàacáica. **12** Quéwa yái tàacáisi Moisés itànèericaté càmírita ichùulìa wenàiwica yeebáidáanápiná Dios, néese yái tàacáisi úimacáita meedá: “Cawinácaalí imàníirica càide iyúwa yái tàacáisi úimáaná, yáta mabáyawanéeripiná Dios iicáca”, úimaca. Quéwa canácata èeri mìnali yáaliméeri imànica càide iyúwa yái tàacáisi úimáaná, ínáté iwàwacutá macáita wéetácawa wabáyawaná ichùulìacawa.

**13** Cristo idéca iwasàaca wía ícha yái yùuwichàacáisi yàanèeripináca wàwali ìwalíise yái càmíináca wamàni càide iyúwa Dios itàacái úimáaná, yái tàacáisi Moisés itànèericaté. Dios

imàacacaté yàasu yùuwichàacáisi yàanàaca Cristo ìwali yéetácaténátewa wáichawalíná. Wáalíacawa Dios yàasu yùuwichàacáisi yàanàacaté Cristo ìwali yácaináté áiba profeta itànàacaté Dios itàacái íiméerica: “Cawinácalí nachanàidéerica àicu ìwali yéetácaténáwa, náimapiná ìwali Dios idéca yùuwichàidacani manuísíwata”, íimaca.

<sup>14</sup> Càité Cristo Jesú斯 yéetácatéwá píichawalínacué yéewanápiná Dios imànicuéca nacái pirí yái cayábéerica icàlidéericate ìwali Abraham irí, píacué càmíiyéica judío yeebáidéeyéica Cristo Jesú斯 itàacái, yéewanápiná nacái macáita wía weedáca Espíritu Santo wawàwalículéwa càide iyúwa Dios íimáaná weebáidacaalí Jesucristo itàacái.

### *La ley y la promesa*

<sup>15</sup> Píacué nuénánáica, siùcade nucàlidacué pirí comparación nàwali níái chái èeri irìcuíyéica: Asìali imànicaalí wawàsi áiba wenàiwica yáapicha, yá natànàaca nàasu wawàsi iináwaná ìwaliwa cuyàluta irìcu. Néese natànàaca náipidenáwa cuyàluta irìcu náasáidacaténá cawèníiricani, yái wawàsi namàníirica náapichawáaca. Yá canáca yéewaná áiba wenàiwica yúucaca yái wawàsica, càmita nacái yéewa áiba wenàiwica itùculìadaca tàacáisi quirítia. <sup>16</sup> Càité nacái Dios icàlidaca Abraham iríni cáimiétacanéeri iyú imàníinápináté Abraham irí cayábéeri, itaquérinámi irí nacái. Yái tàacáisi càmita íima “itaquénáinámi”, íimáanáca manùbéeyéi, néese íima “itaquérinámi”, íimáanáca abéeri wenàiwica. Yái Abraham itaquérinámi yácata yái Cristoca. <sup>17</sup> Yácatá nuwàwéericuéca núumaca pirí: Dios imànicaté wawàsi Abraham

yáapicha, néese cawèníirica Dios imànica yái wawàsi íipidená ìwaliwa máiní cáimiétacanéeri iyú. Néeseté cuatrocientos treinta camuí Abraham yàasu èeri idénáamité àniwa, yá Dios imàcacaté itàacáiwa profeta Moisés irí, nalípiná níara israelitaca. Moisés yàasu tàacáisi càmita yéewa canéerica iwèni imànica yái idàbáanéeri wawàsica Dios imàníiricaté Abraham yáapicha. Càmita nacái yéewa Moisés yàasu tàacáisi canéerica iwèni imànica Dios itàacái bàaluitéeri cachàiníwanái Moisés yàasu tàacáisi lícha, Dios icàlidacaináté Abraham iríni cáimiétacanéeri iyú madécaná camuí Moisés yàasu tàacáisi ipíchawáiseté. <sup>18</sup> Càmita Dios imàni walí cayábéeri ìwalíise yái wamànínáca càide iyúwa Moisés yàasu tàacáisi íimáaná. Néese Dios icàlidacaté Abraham iríni cáimiétacanéeri iyú imàníinápináté nalí cayábéeri mawèníri iyú, cawinácalí yeebáidéeyéica Dios càide iyúwaté Abraham yeebáidáaná. Iná wáalíacawa càmita yéewa weedáca walíwa yái cayábéerica ìwalíise yái wamànínáca càide iyúwa Moisés yàasu tàacáisi íimáaná.

<sup>19</sup> Siùcade cawàwanáta áibanái iwàwa isutáca yéemìawa núá cánáté yéewaná Dios imàcacaca itàacáiwa profeta Moisés irí ichùulliacaténáté israelitanái. Uwé, Dios imàcacaté nalí itàacáiwa yéewanápiná wáalíacawa cabáyawanáca macái èeri mìnánai, càmita nacái wamàni càide iyúwa Dios íimáaná. Iwàwaçutácaté namànica càide iyúwa Moisés yàasu tàacáisi íimáaná àta Abraham itaquérinámi yàanàacatalétaté aléi èeri irìculé, yái Cristoca, Dios icàlidéericaté irí cáimiétacanéeri iyú imàcacáanápináté Cristo imànica cayábéeri èeri

mìnánáí irí. Dios imàcacaté tàacáisi yàasu ángelnái iríwa nacàlidacaténáté itàacái Moisés irí, néese Moisés ichùullacaté israelitanái namànínápináté càide iyúwa Dios íimáaná. <sup>20</sup> Quéwa abérera yái Dios itàaníiricaté Abraham irí, càmitaté Dios ibànùa ángelnái nacàlidacaténáté Abraham irí Dios imànínápináté irí cayábéeri mawèníri iyú. Iná yái wawàsi Dios imànírericaté cáimiétacanéeri iyú Abraham yáapicha, cachàiníricaní Moisés yàasu tàacáisi íicha.

### *El propósito de la ley*

<sup>21</sup> Yái tàacáisi nucàlidéericuéca pirí càmita íimáaná profeta Moisés yàasu tàacáisi yùuwíde imànicá Dios itàacái, yáara wawàsi Dios imànírericaté cáimiétacanéeri iyú Abraham yáapicha. ¡Càmírita! Néese Dios càmita mabáyawaná iicáca wía ìwalíise yái wamànínáca càide iyúwa Moisés yàasu tàacáisi ichùulianá wía. Iná Moisés yàasu tàacáisi càmita yáalimá yàaca wacáuca càmíri imáalàawa. <sup>22</sup> Càita nacái Dios itàacái icàlidaca walíni: Wabáyawaná ichàini idacùaca wía iyúwa presoíyéi, macáita wía èeri mìnánáica. Càica Dios itàacái íimaca yéewanápiná cawinácaalí yeebáidéeyéica Jesucristo náalimáanápiná needáca nalíwa yái cayábéerica Dios íiméericaté cáimiétacanéeri iyú imànínápináté nalí.

<sup>23</sup> Ipíchawáiseté Jesucristo yàanàaca aléi èeri irìculé, wía judíoca càmitaté yéewa weebáidacani iwasàacaténá wía Dios yàasu yùuwichàacáisi íicha. Yái tàacáisi profeta Moisés itànèericaté Dios inùmalícuíse ichùullacaté wía cachàiníri iyú, idacùacaté wía nacái iyúwa presoíyéi, cabáyawanácaináté wía. Càité wàyaca, wía

judíoca, àta Dios imàcacatalétaté wáalíacawa iwàwacutáanátē weebáidaca Jesucristo.

**24** Péemiacué comparación: Càasuíri asìali idèniaca yàasu wenàiwicawa icuèrica íiwacali yéenibewa. Càita nacái yái Moisés yàasu tàacáisisca, càicaténide iyúwa Dios yàasu wenàiwica icuèricaté wía judíoca àta Cristo yàanàacatalétaté yéewanápiná mabáyawanáca Dios iicáca wía ìwalíise yái weebáidáanáca Cristo.

**25** Quéwa Cristo idéca yàanàaca, íná weebáidaca itàacái. Càmita quirínama profeta Moisés yàasu tàacáisi icùaca wía, càide iyúwa càasuíri yàasu wenàiwica càmita icùa íiwacali yéenibewa, béeyícaalí nía. Néese Cristo icùaca wía siùcáisede. **26** Yá nacái Dios yéenibecuéra pía macáita, piacué càmíiyéica judío peebáidacánácué Cristo Jesús itàacái. Yá piyacuéra abédanamata Cristo Jesús yáapicha.

**27** Bàaluité pibautizácuécawa píasáidacaténácué peebáidaca Cristo Jesús, yá pidàbacatécué piyaca abédanamata Cristo yáapicha, piyacuéra nacái siùcade càide iyúwa Cristo íiwitáise ìyáaná.

**28** Cáinináca Dios iicáca wía macáita abédanamata. Canácata wenàiwica Dios iiquéerica iyúwa áiba íiwitáaná judiónái íicha, judíocaalí wía, càita nacái càmíiyéicaalí judío wía, càita nacái áibanái yàasu wenàiwicacaalí wía, càita nacái yèepunícaalíwa máiwacalináwaca wía, càita nacái asìanáicaalí wía, càita nacái inanáicaalí wía, néese wàyacaalí abédanamata Cristo Jesús yáapicha, yá cayábaca Dios iicáca wía macáita abédanamata. **29** Yá nacái Cristo yàasunáicaalícué pía, yásí Dios iicácuéra pía iyúwa Abraham itaquénáinámi nacái. Càipiná nacái Dios imànicuéra piríwa yái cayábéerica càide iyúwaté icàlidáanátē Abraham iríni cáimiétacanéeri

iyú.

## 4

**1-2** Siùcade nucàlidacué pirí comparación píalícaténácuéwa profeta Moisés yàasu tàacáisi ìwali, yái áiba íiwitáanáca tàacáisi Jesucristo itàacái íicha. Cawinácalí wenàiwica imàníyéica mamáalàacata càide iyúwa Moisés yàasu tàacáisi íimáaná nawàwacáiná cayábaca Dios iicáca nía, càica níade iyúwa càasuíri liri idècunitàacá sùmàicani. Càmitàacá yéewa idènìaca yáaniri yàasu cawèníiriwa. Iwàwacutá imànica càide iyúwa icuèrinánái íimáaná. Iná càicanide iyúwa nàasu wenàiwica íibaidéerica mawèníiri iyú càiripináta. Quéwa yái sùmài yáanirica idéca imàacaca abé èeripiná, bérericatalépináta yái lirica. Iná yéewa yàanàacaalí ùucullíri yàasu èeri, yásí namàacaca idènìaca yáaniri yàasu cawèníiriwa. Yái ùucullírica, càicanide iyúwa wía iyéeyéica abédanamata Jesucristo yáapicha. Wáaniri Dios idéca yàaca walí yái cawènírica: Idéca iwasàaca wía yàasu yùuwichàacáisi íichawa ìwalíise yái weebáidáanáca Jesucristo. **3** Bàaluité càicuéca wíade iyúwa yái sùmài nachùulièricaté. Wàyacaté càide iyúwa nàasu wenàiwica íibaidéeyéica mawèníiri iyú càiripináta, demonionái idacùacáináté wáiwitáise bàaluité, níara báawéeyéica ángelca icuèyéica yàasu cáli chènuníiséeyéwa, ichùulièyéica nacái èeri mìnánái íiwitáise càmíyéica yáalía Dios ìwali. **4** Quéwa Dios íináidacatéwa ibànuànanápináté Iiriwa aleí èeri irìculé, iná yéenáwaná yàanàacaalíté, yáté Dios ibànuàaca Iiriwa imusúacaténáwa abéechúa inanái íicha. Judíosàiricaténi, iná imànícitaté càide iyúwa judío

íiwitáise iyáaná, iyúwa nacái Dios itàacái íimáaná, yái tàacáisi profeta Moisés itànèericaté ichùulìacaténá judiónái. <sup>5</sup> Dios ibànùacaté Iiriwa iwasàacaténá wía íicha yái càulenéeri tàacáisi profeta Moisés itànèericaté Dios inùmalìcuíse, wía judíoca. Càité Dios Iiri iwasàaca wía, iwasàacué nacái pía, Dios yeedácaténá wía macáita yéenibepináwa. Iná càmita iwàwacutá wamànica càide iyúwa Moisés yàasu tàacáisi íimáaná cayábáanápiná Dios iicáca wíatá. <sup>6</sup> Néese yáasáidacaténá Dios yéenibeca wía, yá Dios ibànùaca walí Espíritu Santo wawàwaliculé, yái Espíritu Dios Iiri ibànuèrica. Iná yéewa wáimaca Dios irí Espíritu Santo íwitáise iyú: “¡Pía, Wáaniri, cáininéerica waicáca!” íná yéewa wáimaca. <sup>7</sup> Càita Dios isùmàireca pía, càmita quirínama demonio idacùa píiwitáise càmicáiná nàasu wenàiwica pía quirínama, néese Dios Iiri idéca iwasàaca pía náicha. Siùcáisede Dios isùmàireca pía, íná Dios idéca nacái iwasàaca pía yàasu yùuwichàacáisi íichawa.

### *Pablo se preocupa por los creyentes*

<sup>8</sup> Píacué càmíiyéica judío, bàaluité càmitacué píalíawa Dios ìwali, yáté càicuéca píade iyúwa demonio yàasu wenàiwica, demonionái idacùacáinácué píiwitáise, piacaténátē nacàaluíniná, níara cuwáináica, íipidenéeyéica diosnái, bàaluitécáiná piyúunáidacuéca báisíiri Diosca nía. <sup>9</sup> Quéwacué siùcade píalíacuécawa Dios ìwali. Cayába cachàini núumaca Dios idéca iicácuéca pipualé quéechatécáwa imànicaténácué pirí cayábéeri. Iná ¿cánácué piwàwa pèepùacawa Dios íicha peebáidacaténá demonio itàacái àniwa, níái canápinéeyéica càmíiyéicué yáalimá iyúudàaca

pía? ¿Cánácué piwàwa pimàacaca nadacùaca píwitáise àniwa? Pidàbacaalícué pimànica càide iyúwa Moisés yàasu tàacáisi ísimáaná cayábáanápiná Dios iicácuéca pía, yásí càicuéca píade iyúwa wenàiwica iwàwéeyéica demonio nadacùaca íwitáise. <sup>10</sup> Aibañái idéca ichìwáidacuéca pía, íná pidécuéca pidàbaca pimànica macái culto íwitáaná càide iyúwa judiónái imàníiná sábado irìcu, áiba èeri nacái, quéeri imanùbaca nacái, camuí imanùbaca nacái. Càitacué pimànica madécaná culto cayábáanápinácué máadáiní Dios iicáca pía, piyúunáidacáinácué piwasàanápiná piawawa Dios yàasu yùuwichàacáisi íicha ìwalíise yái pimàníináca culto. <sup>11</sup> Iná máiní achúmaca nuwàwa nuínáidacawa pìwalicué cawàwanáta canáca iwèni yái nuéwáidáanátécuéca pía. Peebáidacaalícué cachìwéeyéi yàasu tàacáisi, yásí canáca iwèni meedá yái nuéwáidáanátécuéca pía.

<sup>12</sup> Píacué nuénánáica, nusutácué píicha wawàsi manuísíwata. Pìyacué càide iyúwa nùyáaná. Càmita numàni mamáalàacata càulenéeri wawàsi judiónái imàníirica cayábáanápiná náapicha Dios. Néese nuibàaca nuwàwawa abérerita Jesucristo iwéré iwasàacaténá núa Dios yàasu yùuwichàacáisi íicha càide iyúwacué píibàanáté piwàwawa Jesucristo iwéré pee báidacaalítécué itàacái quéechatécáwa. Bàaluité nùyacaalítécué píapicha, càmitaté pimàni nulí báawéeri. <sup>13</sup> Píalíacuéwa nùuwichàacatéwa uláicái iyú quéechatécáwa nucàlidacaalítécué pirí yái tàacáisi íiméerica Jesucristo iwasàaca wenàiwica Dios yàasu yùuwichàacáisi íicha. <sup>14</sup> Yái nùuwichàanácawa uláicái iyú yáalimáidacatécué iicáwa pía báawáanápináté piicáca núa, nùasu

tàacáisi nacái, máinícáiná báawaca yái uláicáica. Quéwacué càmitaté báawa piicáca núa uláicái ìwalíise. Càmitaté nacái piúca píchawa núa, néese pitàidacatécué núa cayábéeri iyú, peedácatécué núa piataléwa càide iyúwa idéca nacáicaalí Dios yàasu ángel yàanàaca piatalécué; ipimànicatécué nulí cayábéeri càide iyúwa idéca nacáicaalí Jesucristo yàanàaca piatalécué! <sup>15</sup> ¿Cánacué càmita casíimái piwàwa núapicha càide iyúwaté quéechatécáwa? Núalimácué nucàlidaca piináwaná ìwali cayábéeri iyú máinícuéca piwàwacaté piyúudàaca núa, ínátē píalimácaalícué pimusúadaca pituíwa pimàcacaténácué nutuípinátáni, yá pimànicatécué càiritá. <sup>16</sup> Quéwa siùcade nuínáidacawa cawàwanátagué piicáca núa càide iyúwa piuwidewa, ìwalíise yái nucàlidáanácatécué pirí báisíiri tàacáisi.

<sup>17</sup> Níara cachìwéeyéica nàacué picàaluíniná, namànicuéca pirí máiní cayábéeri iyú nacái cáininácaténácué piicáca nía, quéwa càmitacué nawàwa pirí cayábéeri. Nawàwacué báawaca piicáca wíá piicácaténácué níata cáimiétaquéeri iyú. <sup>18</sup> Cayábaca nuémìaca áibanái iináwaná ìwali namànicaalícué pirí cayábéeri nawàwacáiná nayúudàacuéca píá. Cayábaca nacái namànicaalícué pirí cayábéeri càiripináta, càmírita abéta nuyacatáitacué píapicha. <sup>19</sup> Píacué cáininéeyéica nuicáca càide iyúwa nuénibewa, máinícué achúmaca nuínáidacawa nuwàwawa píwalicué àniwa càide iyúwa achúmáaná inanái ìwàwa ùuwichàacaalíwa caiwíiri iyú umusúadacaténá iicá èeri. Yá nùuwichàapináwa nuwàwalícuísewa mamáalàacata

àta peebáidacataléta Cristo itàacái tài íméeri iyú pidènìacaténácué Cristo íiwitáise manuísíwata.  
**20** ¡Máinícué nuwàwaca nùyaca píapicha siùcade nutàanícaténácué píapicha éeréeri iyúta, càmicáiná núalía cayába càinácaalícué iwàwacutáaná núumaca pirí!

### *El ejemplo de Agar y Sara*

**21** Picàlidacué nulí abéeri wawàsi, píacué càmíiyéica judío iwàwéeyéica idacùaca íiwitáisewa pimànicaténácué càide iyúwa càulenéeri tàacáisi íimáaná, yái tàacáisi profeta Moisés itànèericaté ichùulìacaténáté judiónái. Báisícaalícué piwàwa pimànica càide iyúwa yái tàacáisi íimáaná Dios iwasàanápinácué pía yàasu yùuwichàacáisi íichawa, néese ¿cánácué càmitàacá péewáidawa ìwali cayábéeri iyú píalíacaténácuéwa càinácaalí íimáaná? **22** Dios itàacái profeta Moisés itànèericaté íimaca: Abraham idènìacaté íinuwa idàbáanéechúa íipidenéechúaca Sara, càmíichúaca yàasu wenàiwica. Idènìacaté nacái íinuwa íipidenéechúa Agar, úai Sara yàasu wenàiwicaca íibaidéechúaca nalí mawènìiri iyú càiripináta. Abraham idènìacaté ìiriwa Ismael Agar yáapicha. Idènìacaté nacái ìiriwa Isaac Sara yáapicha. **23** Uái Agarca, nàasu wenàiwica íibaidéechúaca nalí, udéerìcucaté, néese umusúadaca iicá èeri càide iyúwa macái èeri mìnánái imàníiná. Quéwa úai Saraca, càmíichúataté nàasu wenàiwica, umusúadacaté iicá èeri Dios imànicáináté yái càmíirica wenàiwica idé imànica, càmicáináté yáalimá Sara udéerìcu, quéwa Dios ichàiniadacaté úa udènìacaténá uìriwa Abraham yáapicha càide iyúwaté Dios icàlidáaná

Abraham iríni quéechatécáwa, cáimiétacanéeri iyú. <sup>24</sup> Yái tàacáisi pucháiba inanái ìwalírica yáasáidaca walí comparación. Níái pucháiba inanáica íimáanáca càicanide iyúwa pucháiba wawàsi Dios imàníricaté wenàiwicanái yáapicha yàasu wenàiwicacaténáté nía. Abéeri wawàsi yácata yái Dios itàacái profeta Moisés itànèericaté ichùulìacaténá israelitanái nàyamáacaalítéwa mawiénita manuíri dúli irí íipidenéeri Sinaí, Dios imànicatáicaté náapicha wawàsi icùanáté nía. Yái Moisés yàasu tàacásica, càicanide iyúwa Agar, úái nàasu wenàiwica íibaidéechúacaté mawèníiri iyú càiripináta. Péemìacué comparación: Macái sùmài imusuérictéwa nàasu wenàiwica íicha iwàwacutácaté íibaidaca yáatúa íiwacali iríwa mawèníiri iyú càiripináta. Càita nacái cawinácalí wenàiwica iwàwéeyéica isímáidaca Dios ìwalíise yái namànínáca càide iyúwa Moisés yàasu tàacáisi íimáaná, càica níade iyúwa áibanái yàasu wenàiwica íibaidéeyéica mawèníiri iyú càiripináta. <sup>25</sup> Iná Agar íimáanáca càicanide iyúwa Sinaí yàasu manuíri dúli, iyéerica Arabia yàasu cáli íinata. Siùcade Jerusalén ìyacàlená mìnánái càmíiyéi yeebáida Jesucristo itàacái càica níade iyúwa Agar yéenibe, úái nàasu wenàiwica íibaidéechúacaté mawèníiri iyú càiripináta, níacáiná judíonái namànica mamálàacata càide iyúwa bàaluísàimi tàacáisi íimáaná Moisés itànèericaté ichùulìacaténá israelitanái, quéwa canácatáita náalimá cài nawasàaca níawawa Dios yàasu yùuwichàacáisi íicha. <sup>26</sup> Quéwa úái Saraca, càmíichúataté nàasu wenàiwica, íimáanáca càicanide iyúwa wàyacàlepiná chènuníséeri íipidenáctataléca wàlisài Jerusalén,

wía yeebáidéeyéica Jesucristo itàacái. Canácata idacuèri wía iyúwa nàasu wenàiwica íbaidéeyéica mawèníiri iyú càiripináta, Jesucristocáiná idéca iwasàaca wía iicha yái càulenéeri tàacásica Moisés ichùulièricaté iyú israelitanái. <sup>27</sup> Wáalíacawa wadèniaca wàyacàlepináwa yái Jerusalén iyacàlená chènuníséerica, yácainá áiba profeta itànàacaté comparación Jerusalén ìwali Dios inùmalícuíse. Càica íimáanáca yái comparaciónca: Píacué Jerusalén iyacàlená chènuníséeri mìnánáica. Aibanái iicácuéca pía iyúwa másibáanata meedá càide iyúwa abéechúa inanái càmíichúa yáalimá idèniaca yéenibewa. Quéwa, siùcade casíimáicué piwàwa manuísíwata, pimáidacué casíimáiri iyú nacái. Manùbapinácué pía náicha níara imàníiyéica mamáalàacata càide iyúwa profeta Moisés yàasu tàacáisi bàaluisàimi íimáaná cayábáanápiná Dios iicáca nía, càica íimáanáca yái comparaciónca. <sup>28</sup> Píacué nuénánáica, càicuéca píade iyúwa Abraham ìiri íipidenéericaté Isaac. Píatacué Dios iiquéeyéica iyúwa Abraham itaquénainámi. Píatacué Dios icàlidéeyéicaté ìwali Abraham irí itaquénainápináté nía, píacué yeebáidéeyéica Jesucristo itàacái. <sup>29</sup> Quéwa siùcade áibanái judío càmíiyéica yeebáida Jesucristo itàacái namànica walí báawéeri càide iyúwa Agar ìiri Ismael imàníináté báawéeri Sara ìiri irí, íipidenéericaté Isaac. Yái Ismael imusúacaté iicá èeri càide iyúwa macái èeri mìnánái iyáaná, quéwa Espíritu Santo imànicaté yái càmíirica wenàiwica idé imànica yéewacaténáté Isaac imusúa iicá èeri. Càita nacái Espíritu Santo idéca imàacaca Dios yéenibeca wía.

Yá nacái judiónái imàníyéica mamáalàacata càide iyúwa Moisés yàasu tàacáisi bàaluisàimi íimáaná nàuwichàidaca wía. <sup>30</sup> Dios íimacaté Abraham irí bàaluité: “Pichùulìa píichawa úái Agarca, píasu wenàiwicaca íibaidéechúaca pirí mawèníiri iyú; pibànùa úapicha uìri nacái, nàcaténáwa déeculé píicha; canácainá yéewanápiná íibaidéechúa pirí uìri yeedáca píasumi yáapicha yái píri Isaac, pidènièrica pínu Sara yáapichawa, úái càmíchúaca íibaida mawèníiri iyú càiripináta”, càité íimaca. <sup>31</sup> Iná píacué nuénánáica, wía yeebáidéeyéica Jesucristo itàacái, càmita cài wíade iyúwa Agar yéenibe, íibaidéeyéipinátē mawèníiri iyú càiripináta càide iyúwa áibanái yàasu wenàiwica meedá. Càmita iwàwacutá wamànicà mamáalàacata càide iyúwa Moisés yàasu tàacáisi bàaluisàimi íimáaná. Néese càica wíade iyúwa Sara yéenibe, úái càmíchúacaté áibanái yàasu wenàiwica, Jesucristocainá idéca iwasàaca wía, yéewacaténá Dios yéenibeca wía.

## 5

### *Firmes en la libertad*

<sup>1</sup> Cristo idéca iwasàaca wía íicha yái càulenéeri tàacásica profeta Moisés ichùulièricaté iyú israelitanái. Iná càmita iwàwacutá wamànicà càide iyúwa Moisés yàasu tàacáisi íimáaná cayábáanápiná wáapicha Dios Cristo yéetácainátewa wáichawalíná wabáyananá ìwalíise iwasàcaténá wía Dios yàasu yùuwichàacáisi íicha. Iná cachàinicué píwitáise pèepunícaténácuéwa macàaluínináwaca. Aibanái iwàwa idacùacuéca píwitáise àniwa iyúwa nàasu wenàiwica iwàwacutéeyéica íibaidaca cachàini mawèníiri iyú càiripináta. Náimaca

iwàwacutáanásacué pimànica càide iyúwa Moisés yàasu tàacáisi bàaluisàimi íimáaná cayábáanápiná Dios iicácuéca pía. Picácué peebá nachìwa.

<sup>2</sup> Péemìlacué nulí cayába. Núa Pablo núumacué pirí, píacué càmíiyéica judío, pimàacacaalícué cachìwéeyéi namànicuéca pirí circuncisión piwasàanápinácué píawawa Dios yàasu yùuwichàacáisi íicha, néese càmitanica Cristo iwasàacué píawa. <sup>3</sup> Nuwàwa nucàlidacuéca pirí àniwani: áibacaalí asìali imàacacaalí namànica irí circuncisión cayábáanápiná Dios iicácani, yásí iwàwacutáca imànica macáita machacàníri iyú càide iyúwa Moisés ichùullanáté israelitanái.

<sup>4</sup> Píacué iwàwéeyéica mabáyawanáca Dios iicáca pía ìwalíise yái pimànínácuéca càide iyúwa Moisés yàasu tàacáisi íimáaná. Péemìlacué cayába: Pidécuéca piwènúadaca píwitáisewa Cristo íicha, piúcacáinácué píchawani, yái cayábéerica Dios iwàwéericuéca imànica pirí. <sup>5</sup> Quéwa wía yeebáidéeyéica Jesucristo itàacáí, Espíritu Santo imàacaca wáalíacawa, imàaca nacái weebáidaca mabáyawanáanáca Dios iicáca wía. <sup>6</sup> Wía iyéeyéica abédanamata Cristo Jesús yáapicha, canáta iwèni Dios irí áibanái imànicaalí walí circuncisión, càita nacái càmicaalí namàni walí circuncisión. Abéerita iwàwacutá weebáidaca Jesucristo itàacáí. Básícaalí weebáidaca, yásí wamànipiná áibanái irí cayábéeri cáininéeri iyú.

<sup>7</sup> Quéechatécáwa peebáidacatécué cayába. ¿Cánácué pimàaca áibanái cachìwéeyéi iwènúadaca píwitáise íicha yái báisíiri tàacáisica? <sup>8</sup> Càmírita Dios yái imènìadéericuéca pía; néese Dios idéca imáidacuéca pía iwasàacaténácué pía íicha yái càulenéeri wawàsica. <sup>9</sup> Aiba comparación

íimaca: “Nèewìadacaalí achúmanamata levadura íbesi yèewi, yásí levadura imàacaca macáita íbesi inísàacawa”, cài íimaca. Càita nacái pimàacacaalícué áiba wenàiwica yéewáidacuéca pía cachìwéeri tàacáisi iyú, yásí mesúnamáita macáita piméeràapinácuécawa báisíri tàacáisi íicha. <sup>10</sup> Quéwa manuíca nuínáidacawa nuwàwawa Wáiwacali ìwali càmíinápinácué píináidawa áibalé íicha yái nuínáidáanácawa. Núalía nacáiwa Dios yùuwichàidáanápiná abédanama macáita cawinácaalí imènìadéericuéca pía cachìwéeri tàacáisi iyú.

<sup>11</sup> Píacué nuénánáica píalíacuéwa cayába càmita nuchùulìa wenàiwica namànínápiná nalíwa circuncisión cayábáanápiná Dios iicáca nía. Nucàlidacaalí mamáalàacata nalítáni, yásí judiónái càmita nàuwichàida mamáalàacata núatá nùasu tàacáisi ìwalíisewa, níacainá judíoca nawàwaca macáita namànica circuncisión, náimacainá càmitasa cayába Dios iicáca wenàiwica càmíiyéica imàni circuncisión. Quéwa báawaca meedá judiónái iicáca nucàlidáaná Cristo ìwali yéetáanátéwa cruz ìwali wáichawalíná iwasàacaténá wía Dios yàasu yùuwichàacáisi íicha. <sup>12</sup> Quéwa níara imènìadéeyéicuéca pía cachìwéeri tàacáisi iyú pimàacacaténácué namànica pirí circuncisión cayábáanápiná Dios iicáca pía, néese ¿cáná càmita nèepùawa píichacué náiríadacaténá naináwatá? Báawacainá Dios iicáca yái nachùulianácuéca pimànica circuncisión, píacué càmíiyéica judío.

<sup>13</sup> Néeni píacué nuénánáica, Dios idéca imáidacuéca pía iwasàacaténácué pía yéewanápinácué pèepunícwawa matuíbanáiri iyú.

Càmitacué iwàwacutá pimànica càide iyúwa càulenéeri tàacáisi íimáaná Moisés itànèericaté, quéwa picácué pimàni máiwitáséeri iyú meedá càide iyúwa píwitáise bàaluisàimi iwàwáaná imànica mamálàacata. Néese piyúudàayacacuéwa píasáidacaténácué cainináca piicáyacacawa.

**14** Macáita tàacáisi Moisés itànèericaté Dios inùmalícuíse íimáanáca abérera wawàsi. Cài íimaca yái abérera ichùullacanásica máiníiri iwàwacutáca weebáidaca: “Caininá piicáca áibanái wenàiwica, càide iyúwa cainináaná piicáca píawawa”, cài íimaca.

**15** Picácué picuísáyacawa, caita nacái picácué pitàaní báawéeri iyú piríwáaca càide iyúwa cuwèesináí yaamíayacacaalíwa, nayáayacaca nacáiwa. Pimànciaalícué cairi báawéeri, néese càmitacué quirínama cainináca piicáyacacawa, yá nacái càmitacué quirínama peebáida Cristo itàacái.

### *Los deseos humanos y la vida por el Espíritu*

**16** Iná núumacué pirí: Pìyacué càide iyúwa Espíritu Santo ichùullanácué pía. Picácué pimàni càide iyúwa píwitáise bàaluisàimi iwàwáanácué pimànica pibáyawanáwa. **17** Yácainá wáiwitáise bàaluisàimi yùuwídeca imànica Espíritu Santo. Caita nacái Espíritu Santo yùuwídeca imànica wáiwitáise bàaluisàimi iwàwérica wamànica wabáyawanáwa. Yá máiní nàuwidéyacacawa náipunitawáaca ína càulenácuéca pimànica cayábéeri càide iyúwa piwàwáaná. **18** Quéwa Espíritu Santo icùacaalícué píwitáise, néese càmita yéewa Moisés yàasu tàacáisi bàaluisàimi icháawàacuéca pibáyawaná, pimànicainácué cayábéeri càide iyúwa Dios ichùullaná.

**19** Macáita wáalíacawa càinácaalí iyú namànica níara yèepuníiyéicawa càide iyúwa náiwitáise báaluisàimi cabáyawanéeri ichùullaná nía: Naimáca áiba yáapicha càmíchúaca náinusíwa, càmíirica nacái nanirisíwa; namàni nacái nainá iyúwa casaquèeri wawàsi càmíirica Dios ibatàa wenàiwica imànica; namànica macái báawéeri íwitáaná máaléquéeri iyú, mabáiníri iyú áibanái yàacuésemi. **20** Nàaca cuwánai yéenáwaná icàaluíniná, níái ídoloca; namàni nacái namàliyéidewa namáidacaténá demonionái iyúudàanápiná nía; nàuwidéyacacawa náipunitawáaca. Nacuísáyacacawa; báawaca naicáyacacawa nàasu cawèníri ìwalísewáaca. Ráunamáita calúaca nía. Namànica macái wawàsi nalípináwa meedá; càmita nawàwa abédanaméeri náiwitáise áibanái yáapicha; naseríaca náichawáaca.

**21** Nawàwa needáca nàasupináwa áibanái wenàiwica yàasu; nanúaca wenàiwica; icàmeyéi nacái; camùnica nía, iyéeyéica mání manuí iyáacaléwa; yá namànica macái báawéeri íwitáaná. Càita nùalàacuéca pía siùca àniwade càide iyúwaté nucàlidáanácué pirí báaluité: Macái wenàiwica imàníiyéica iyaca ibáyawanáwa cài mamáalàacata, canáca yéewanápiná nawàlùacawa Dios iyacàle irìculé Dios icùacataléca macáita chènuniré.

**22** Quéwa Espíritu Santo icùacaalí wáiwitáise, yásí cáinináca waicáca áibanái; cayábaca nacái wawàwa; matuíbanáica nacái wáiwitáise; wàidenìaca nacái wàuwichàanáwa matuíbanáiri iyú áibanái imànicaalí walí báawéeri; cayábaca nacái wáiwitáise; wamàni nacái áibanái irí cayábéeri; wamànica macáita machacàníri iyú yéewanápiná manuíca áibanái ínáidacawa

iwàwawa wàwali. **23** Espíritu Santo icùacaalí wáiwitáise, yá càmita caimacái waicá wíawawa áibañái íicha; wacùa nacái wíawawa ipíchaná wamànica wabáyawanáwa. Iná wamàacacaalí Espíritu Santo icùaca wáiwitáise, yásí wamànica wàyaca càide iyúwa Dios itàacái ichùulìaná wía. **24** Càide iyúwaté natàtìaná Jesucristo cruz ìwali, càita nacái wía Jesucristo yàasunáica, wadéca wawènúacawa wáiwitáise bàaluisàimi íchawa, càide iyúwa wadéca nacáicaalí watatàaca wáiwitáise bàaluisàimiwa cruz ìwali yéetácaténáwa, macáita yái wabáyawanáca wawàwérica wamànica. Càita iwàwacutá waicáca wíawawa iyúwa yéetéeyéimiwa càmíiyéica yáalimá imànica ibáyawanáwa, ipíchaná wamànica wabáyawanáwa. **25** Espíritu Santo idéca yàaca wacáuca wàlisài càmíirica imáalàawa, iná iwàwacutá wamàacaca Espíritu Santo icùaca wáiwitáise wamànicaténá càide iyúwa ichùulìaná wía.

**26** Picácué caimacái waicáca wíawawa áibañái íicha. Picácué nacái wáalimáidaca waicá wíawáaca calúanápiná wamàníyacacawa. Picácué nacái báawa waicáyacacawa wàasu cawèníiri ìwalísewáaca.

## 6

### *Ayúdense unos a otros*

**1** Píacué nuénánáica, píalíacaalíwa abéeri péená idéca imànica isicúata ibáyawanáwa, néese abénaméeyéi pèewi Espíritu Santo icuèyéica íwitáise niata iwàwacutá iyúudàacani iwènúadacaténá íwitáisewa Dios irípiná àniwa, nàalàacani nacái imàacáanápiná íchawa ibáyawanáwa. Quéwa iwàwacutácué píalàacani éeréeri iyú.

Piicácué píichawa cayába nacái ipíchaná Satanás yáalimáidacuéra pía nacái pimànínápíncuéra pibáyawanáwa. <sup>2</sup> Piyúudàayacacuéra piwènúadáanápína píiwitáisewa Dios irípiná àniwa pibáyawaná íchacuéra. Càipinácué pimànicàide iyúwaté Cristo ichùulìaná wía, wía yeebáidéeyéica itàacái.

<sup>3</sup> Picácué cachàini waicáca wíawawa áibanái ícha, wíacáná èeri mìnánái, càmita báisí cachàinicá wía. Cáimacáicaalí waicáca wíawawa áibanái ícha, yásí wachìwáidacáita wíawawa meedá. <sup>4</sup> Macáitacué iwàwacutá píináidacawa piwàwalícuísewa ìwali yái pimàníricuéra asáisí cayábacaalíni. Néese cayábacaalíni, yásí yáalimácué casíimáica pía piwàwalícuísewa ìwali yái pimànírica. Iwàwacutácué càmita cáimacái piicáca píawawa áibanái ícha. <sup>5</sup> Macáicaináta wía èeri mìnánáica áibaalí wawàwaca wamànicá wabáyawanáwa, canácainá mabáyawanéeri chái èeri irícu.

<sup>6</sup> Cawinácaalícué yéewáida pía iyú yái Dios itàacái ímérera Jesucristo iwasàaca wenàiwica Dios yàasu yùuwichàacáisi ícha, piacué yàasupiná macái pìasu yéenáwa cayábéeri íwitáaná imanùbaca piacaténácué iwèni.

<sup>7</sup> Abénaméeyéi cachìwéeyéi náimaca càmitasa yéewa Dios iicáca yái pimàníricuéra, càmitasa nacái yùuwichàidapinácué píawa pibáyawaná ìwaliwa. Quéwa nachìwa meedá. Picácué peebá nalí. Càmitacué yéewa pichìwáidaca Dios, piicáanícaténáca iquíniná meedá. Péemìacué comparación: Aiba ibànacaalí bàncalé íimi, yásí yeedáca yái bàncalé íwitáaná iyacanáca yàasu èeri irícu. Caita nacái, càinácaalícué pimànicá, yásí

Dios yàapinácué piwèni. <sup>8</sup> Cawinácaalí imànírica ibáyawanáwa càide iyúwa íiwitáise cabáyawanéeri iwàwáaná, yéetápinácawa yùuwichàacaténáwa càripináta. Quéwa cawinácaalí imànírica càide iyúwa Espíritu Santo iwàwáaná, yeedápináca iríwa icáucawa càmíri imáalàawa Espíritu Santo yèeripináca irí. <sup>9</sup> Iná iwàwacutá càmita waméyáawa wamànica cayábéeri, yácainá càmicaalí waméyáawa wamànica cayábéeri, yásí Dios yàapiná walí wàasu cawéniiriwa áibaalípiná yéenáwaná yàanàacatalépináca. <sup>10</sup> Iná chàcatáinápinácaalí wáalimáca wamànica cayábéeri, iwàwacutá wamànica cayábéeri macái irítá, cachàiníwaná nacái nalí waiquéeyéica iyúwa wéenánáisíwawa neebáidacáiná Jesucristo itàacái.

### *Advertencias y saludos finales*

<sup>11</sup> ¡Piicácué yái manuíri letra nutànèericuéca pirí siùcade nutànàacaténácué pirí yái achúmérína tàacáisica nucáapi iyúwa! <sup>12</sup> Níara ichùulièyéica pimàníinápinácué piríwa circuncisión nacàlidaca càiri cachìwéeri tàacáisi cayábacaténácáita áibanáí judiónáí iicáca nía meedá. Càmita nawàwa judiónáí yùuwichàidaca nía ìwalíise yái nacàlidáanáca tàacáisi íméríca Jesucristo yéetáanátéwa cruz ìwali wáichawalíná iwasàacaténá wía Dios yàasu yùuwichàacáisi íicha. <sup>13</sup> Níara judíoca càmita namàni macáita càide iyúwa profeta Moisés yàasu tàacáisi ichùulianá judiónáí imànica. Canácata yáalimérica imànica macáita machacàníri iyú càide iyúwa Moisés yàasu tàacáisi íimáaná. Nawàwacáita nacàlidaca naináwanáwa piwalicué canùmaséeri iyú meedá; nawàwa nacàlidaca

nachùulìacuécasa pía pimànicaténácué circuncisión áibanáicaténá yáalíacawa néewáidacalécuéca pía, níái cachiwéeyéica. **14** Quéwa càmita nuwàwa nucàlidaca nuináwanáwa canùmaséeri iyú. Néese nuwàwa nucàlidaca abérera Wáiwacali Jesucristo iináwaná ìwali, yéetácatéwa cruz ìwali iwassàacaténá wía Dios yàasu yùuwichàacáisi íicha. Cristo yéetácatéwa cruz ìwali nuíchawalíná, íná nuicáca núawawa nacái càide iyúwa wenàiwica yéetéericatewa íicha macái wawàsi báawéerica èeri mìnánái iwàwéerica numànica. Canéeri nulí iwèni macáita yái báawéerica, càmita quirínama nuwàwa numàni cài. **15** Néese, wàyacaalí abédanamata Cristo Jesús yáapicha, yá canéeri walí iwèni wasèenáí imànicaalí walí circuncisión, càita nacái càmicaalí namànité walí circuncisión. Abérera cawènírica walí yái Dios iwàlisàidáanáca wáiwitáise, wía yeebáidéeyéica Jesucristo itàacái. **16** Nusutácué Dios íicha pirípinácué imàacáanápiná piyaca matuíbanáiri iyú, iicáanápinácué pipualé nacái, macáitacué pía yeebáidéeyéica càide iyúwa nucàlidáanácué piríni, macáitacué pía nacái Dios yàasu wenàiwicaca báisíri iyú.

**17** Siùcásede càmita nuwàwa áibanáí íimaca càmitasa Jesús ibànùa núa, nasàiwicacaténá nulí wawàsi. Yái cabèesi yáaminá nùwalíiséerica yásáidaca amaléeri iyú nudéca nùuwichàacawa Jesús irípiná yàasu wenàiwicacáiná núa.

**18** Píacué nuénánáica, nusutácué Wáiwacali Jesucristo íicha pirípinácué imànníinápiná pirí cayábéeri mawèníiri iyú, macáitacué pía. Básíta, amén.

## **El Nuevo Testamento de nuestro Señor Jesucristo en el idioma piapoco New Testament in Piapoco**

copyright © 2009 Wycliffe Bible Translators, Inc.

Language: Piapoco

Translation by: Wycliffe Bible Translators, Inc.

Piapoco

pio

Colombia

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Piapoco

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

15b1335d-e064-57a2-9f7f-a5383125b741